

金聲玉振集

七

全

書

目

錄

集

卷

周顛仙傳

金聲玉振集

皇覽

大明

太祖高皇帝御製周顛仙人傳并詩

顛人姓周者自言南昌屬郡建昌人也年一
十有四歲因患顛疾父母無暇常拘於是顛
入南昌乞食於市歲如常顛如是更無他往
元至正間失記何年忽入撫州一次未幾仍
歸南昌有施力於市戶之家日與稠人相雜
暮宿閭閻之下歲將三十餘俄有異詞凡新
官到任必謁見而訴之其詞曰告太平此異

言也何以見當是時元天下承平將亂在邇其顛者故發此言乃曰異詞不數年元天下亂所在英雄據險殺無寧日其稱僞漢陳友諒者帥烏合之衆以入南昌其顛者無與言也未幾朕親帥舟師復取南昌城降朕撫民既定而歸建業於南昌東華門道左見男子一人拜於道傍朕謂左右曰此何人也左右皆曰顛人朕三月歸建業顛者六月至朕親出督工逢顛者來謁謂顛曰此來何爲對曰告太平如此者朝出則逢之所告如前或左

或右或前或後務以此言爲先有時遙見以
手入曾襟中似乎討物以手置口中問其故
乃曰蟲子復謂曰幾何對曰二三斗此等異
言大槩知朕之不寧當首見時卽言婆娘又
又鄉談中常歌云世上甚麼動得人心只有
臙脂盱粉動得婆娘嫂裏人及問其故對曰
你只這般只這般每每如此及告太平終日
被此顛者所煩特以燒酒醉之暢飲弗醉明
日又來仍以虱多爲說於是製新衣易彼之
舊衣至朕視顛者舊裙腰間藏三寸許菖蒲

一莖謂顛者曰此物何用對曰細嚼飲水腹
無痛朕細嚼水吞之是後顛者日顛不已命
蒸之初以巨缸覆之令顛者居其內以五尺
圍蘆薪緣缸燬之薪盡火消揭缸而視之儼
然如故是後復蒸之以五尺圍蘆薪一束半
以缸覆顛者於內煨煉之薪盡火消之後揭
缸視之其煙疑於缸底若張綿狀顛者微以
首撼撼小水微出即醒無恙命寄食於蔣山
寺主僧領之月餘僧來告顛者有異狀與沙
彌爭飯遂怒不食今半月矣朕竒之明日命

駕親往詢視之至寺遙見顛者來迂步趨無
難容無饑色是其異也因盛殽羞同享于翠
微亭膳後朕密謂主僧曰令顛者清齋一月
以視其能否主僧如朕命防顛者於一室朕
每三日一問問至二十有三日果不飲膳是
出凡人也朕親往以開之諸軍將士聞是爭
取酒殽以供之大飽弗納所飲食者盡出之
良久召至朕共享食如前納之弗出酒過且
酣先於朕歸道傍側道右邊待朕至顛者以
手畫地成圈指謂朕曰你打破箇桶做箇桶

發此異言當是時金陵村民聞知爭邀供養
一日逢後主者俄出異詞噫教你充軍便充
軍又閑中見朕常歌曰山東只好立一個省
未幾朕將西征九江時問顛曰此行可乎應
聲曰可朕謂顛者曰彼已稱帝今與彼戰豈
不難乎顛者故作顛態仰面視屋之上久之
穩首正容以手拂之曰上面無他的朕謂曰
此行你偕往可乎曰可詢畢朕歸其顛者以
平日所持拐擎之急趨朕之馬前搖舞之狀
若壯士揮戈之勢此露必勝之兆後兵行帶

往至皖城無風舟師難行遣人問之顛乃曰
只管行只管有風無膽不行便無風於是諸
軍上牽以舟薄岸泝流而上不二三里微風
漸起又不十里大風猛作揚帆長驅遂達小
孤朕曾謂相伴者曰其顛人無正語防閑之
倘有謬詞來報馬當中江豚戲水顛者曰水
恠見前損人多伴者來報朕不然其說顛果
無知棄溺於江中至湖口失訖人數約有十
七八人將顛者領去湖口小江邊意在溺死
去久而歸顛者同來問命往者何不置之死

地又復生來對曰難置之於死語未既顛者
猝謂朕欲食朕與之食食既顛者整頓精神
衣服之類若遠行之狀至朕前鞠躬舒項謂
朕曰你殺之朕謂曰被你煩多殺且未敢且
縱你行遂糗糧而往去後莫知所之朕於彭
蠡之中大戰之後回江上星列水師以據江
勢暇中試令人往匡廬之下顛者所向之方
詢土居之民要知顛者之有無地荒人無惟
太平宮側草莽間一民居之以顛者狀云之
謂民人曰是曾見否對曰前者俄有一瘦長

人物初至我處聲言好了我告太平來了你
爲民者用心種田語後於我宅內不食半月
矣深入匡廬無知所之朕戰後歸來癸卯圍
武昌甲辰平荆楚乙巳入兩浙戊申平吳越
下中原兩廣福建天下混一洪武癸亥八月
俄有赤脚僧名覺顯者至自言於匡廬深山
巖壑中見一老人使我來謂大明天子有
說問其說乃云國祚殿廷儀禮司以此奏朕
思方今虛誑者多朕馭宇內至尊於黔黎之
上奉上下兩間善聽善見恐貽民嘆故不見

荅是僧伺候四年仍往匡廬意在欲見朕不
與見以詩三首寄之去後二年以便人詢之
果曾見否其赤脚僧云不復再見又四年朕
患熱證幾將去世俄赤脚僧至言天眼尊者
及周顛仙人遣某送藥至朕初又不欲見少
思之旣病人以藥來雖其假合見之出與見
惠朕以藥藥之名其一曰溫良藥兩片其一
曰溫良石一塊其用之方金盆子盛着背上
磨着金醃子內喫一醃便好朕遂服之初無
甚異初服在未時間至點燈時周身肉肉搐

製此藥之應也當夜病愈精神日強一日服
過三番乃聞菖蒲香醖其有丹砂沉墜鮮紅
異世有者其赤脚僧云某住天池寺去巖有
五里餘俄有徐道人來言竹林寺見詩往視
之某與同往見天眼尊者坐竹林寺中少頃
一披草衣者入某謂天眼曰此何人也即今
人主詩某問曰詩將視看對曰已寫於石上
觀之果有詩二首朕謂赤脚曰還能記乎曰
能即命錄之初見其詩麤俗無音無韻似乎
非詩也及遣人詣匡廬召取之使者至杳然

矣朕復以是詩再觀其詞其字皆異尋常不
在鐫石事耳國之休咎存亡之道已決矣故
紀之以示後人

天眼尊者詩

聖主祥端合天基如影隨形總是癡奉天門下
洪福大生靈有難不肯衣非非想處方出定金
輪積位四海居明君有道乾坤廣等閒一智聲
如雷

周顛仙人詩

初見

聖主合天基一時風來一時癡逐片俱來籀一
桶浩大乾坤正此時人君自此安邦定齊天洪
福謝恩馳我王感得龍顏喜大興佛法當此時
洪武二十六年歲次癸酉九月日從事郎中
書舍人臣詹希原奉 勅書丹并篆額

御製祭天眼尊者周顛仙人徐道人赤脚僧文
昔者具色相空萬物而空萬法外色相而離
之以存一靈斯若是歷萬劫於無量今者神
神妙用幽隱於廬嶽獨爲朕知而濟朕難然
朕終不忘於利濟之恩當以禮謝雖然神已

靈妙難測矣尋常無碍於上下逍遙乎兩間
周遊乎八極翫閱人情猝然禮者杳然弗應
豈不爲世所嗤故先期京師已禱諸祠又遣
使至廬嶽之下禱於廬嶽之神方以禮進禮
不過謝而已矣今世之人知幽明之理者鮮
矣敢請倏然而顯倏然而隱使善者慕而不
得惡者見而難親豈不有補於世道者歟

洪武二十六年歲次癸酉八月十五日

御製群仙詩曰

匡廬之顛有深谷金仙弟子巖爲屋煉丹利

濟幾何年朝耕白雲暮種竹

御製赤脚僧詩曰

跣足慙懃事有秋苦空巔際孰爲儔
愆消累世冤魂斷幻脫當時業海愁
方廣昔聞仙委蹟天池今見佛來由
神憐黔首增吾壽丹餌來臨久疾瘳

洪武二十六年歲次癸酉

周顛仙傳